

Mer ging'n alsu uff'n biehmschn Boahnhof, und ich gamen Jung'n 'n Geldboitel, doas ar de Billette liesen sull. Hoa 'ch do sua schienes Bahnmoarkstöck gehoat met'n Kaisr Friederch, wärd er mer doas weggehahn hon und brängt mer oack anne Moark und sechz'g Pfenge wieder.

„Du hostch ja vergan,“ soagt 'ch, „ich denke, 's kust nor 4 Moark 20 Pfenge.“

„Nu ja,“ soit'r, „'s eß reecht, fer Sed'n 4 Moark 20 Pfenge.“

Do hättch'n ader do bale fer ollen Loit'n Genns hinger de Läßfl gegan. Su a Geld, — as wemmersch uff'n Mist fände! 'S froas ammer,¹⁾ doas muß 'ch sein. Su a Geld!

Ader wie mer su dorch'n Roabenauer Grund fuhr'n, do docht 'ch doche: „'S eß Bald warth.“ Wie mer nu in Ripsdorf oanfoamen, mehnt'ch: „wie weit hoa mer denne nu bis Tebliß?“

„Tebliß?“ soite mei Sohn, „noa Tebliß kumm mer hoite ne, doas leht hingern Gebärge.“

„Woas däche,“ fuhr 'ch'n oan, „wumm mer de hoite im Busche ibernacht'n?“

„Ne Boater,“ soit'r „in Rehfeld.“

Un nu ging's furt emmer'n Berg noan, doas 'ch mern Rock ausziehen un de Weste uff'näbben mußte, und dar Wajg noahm ke Ende, un der Busch och ne, un der Obend foam roan. Ich rädde goar ne mieh, su verwärret waar'ch. Endlich kumm mer uff anne Lichtung, wu ehzelne Hoiser stiehn.

„Doas eß Rehfeld“ soit'r', und ich gink hinger'n har. In oan Goasthause troat'r ein und soite su huchnas'g, wie de jung'n Loite eß sein: „Zwei Nachtgäste!“

„Wir haben Sommerfrischler,“ mehnt'n die, „bei uns ist kein Platz, vielleicht im obern Gasthose.“

Du meine Bitte, docht do, mich mißte doas Dunnerwatter traffen, ich fuhte ja menne Knuch'n kaum mieh. Ader mer muß't'n weitr.

Drauß'n troaf'n mer an jung'n Mensch'n, 's woar der Schulmeester, wie mer dernoch erfuhr'n, dar noahm uns met un brochte uns in äbern Goasthof zor ahlen Liebshern.

Dorte woar mei Sohn a groß Bössl bescheidner un froite: „Können wir vielleicht hier ibernachten?“

Mer fricht'n ader goar keene Antwort, sunnern de

¹⁾ an mir.